

Dokter Nathalie Kingsale ta splica:


Problema di salud mental hopi biaha ta manifesta su mes mas como depresion y psicosis

ORANJESTAD (AAN) – Psikiatra Nathalie Kingsale, den entrevista cu DIARIO a señala cu e problema di salud mental hopi biaha ta manifesta su mes mas como depresion y psicosis, y esaki Respaldo ta keda wak.

E especialista a señala cu e aspecto financiero ta hunga un rol importante den e stress cu hendenan ta experencia, y pa tal motibo hopi ta cay den depresion pasobra no ta logra paga nan cosnan, y esaki ta causa cu nan ta bay den depresion mas lihe.

Dr. Kingsale a subraya cu stress ta acelera e problema di salud mental. Hopi biaha e ta un parti biologico y un parti di loke e persona a pasa den dje como mucha, kiermen den su lanta eigenlijk, “pero si bo tin e sensibilidad pa bira depresivo anto tin yen di factor di stress rond di bo e chens ta mas grandi cu bo ta bira depresivo tambe; si tur cos ta bay bon e chens ta mas chikito”, Kingsale a acentua.

El a reitera cu problema financiero, pero tambe social, relacional, laboral,



tambe ta hunga un rol. El a indica tambe cu Respaldo

no tin un combersacion cu otro instancianan tocante e tema aki, pero na momento cu un persona ta wordo meld cerca Respaldo pero

e motibo ta mas financiero y social, nan ta referi e sea na Hunto of DAS, pasobra nan tambe tin un parti psicologico cu ta guia hende y nan tin e parti financiero cu por duna guia.

“Si e persona tin un problema psiquiatrico compleho, Respaldo tin trahadornan social cu ta guia nan, of check si nan mester bijstand, un pakete di cumin-da, of si nan kier un trabao pero no ta capaz, ta wak si por haci’e via trabaonan boluntario, y si logra traha tanto ora pa dia, ta yude busca un trabao paga”, Dr. Kingsale a menciona.